

佛说月喻经 1 卷

No. 121 [Nos. 99(1136), 100(111)]

佛说月喻经

西天译经三藏传法大师赐紫臣施护奉 诏译

如是我闻：

一时，世尊在王舍城，迦兰陀竹林精舍，与苾刍众俱。是时，世尊告诸苾刍言：「如世所见，皎月圆满，行于虚空，清淨无碍。而诸苾刍，不破威仪，常如初腊者，具足惭愧，若身若心，曾无散乱，如其法仪，入白衣舍，清淨无染，亦复如是。诸苾刍！又如明眼人，或入大水深广之中、或涉江河险恶之处、或履山岩高下之所，以明眼故，而悉能见，离诸疑惧。如前所说，苾刍亦然。诸苾刍！今我所说，犹月行空，清淨无碍。譬明眼人，涉履诸险，离诸疑惧。而迦叶苾刍，不破威仪，常如初腊者，具足惭愧，若身若心，曾无散乱，如其法仪。入白衣舍，清淨无染。离诸怯惧，亦复如是。」

尔时，世尊复告诸苾刍言：「汝等苾刍，若入白衣舍时，当起何心、当以何相而入其舍？」

诸苾刍白佛言：「世尊！佛是所归向，佛为诸法本，佛为清淨眼，我等不知是义云何？愿佛世尊，善为宣说，令诸苾刍，闻已了知。」

佛言：「诸苾刍！汝等谛听，当善作意，今为汝说。若诸苾刍，欲入白衣舍时，应起无着无缚无执取心，依律仪相而入其舍，虽受利养，但欲为彼作诸福事，随自所得分量而受。复善作意，于自不高，于他不下。起如是心，以如是相，应入白衣舍。」

尔时，世尊举手扞空，告苾刍众言：「于汝意云何？虚空有着不？有缚不？有执取不？」

诸苾刍言：「不也。世尊！」

佛言：「若苾刍，以无着无缚无执取心，入白衣舍，亦复如是。」

尔时，世尊又复举手扞空，告苾刍众言：「诸苾刍！于汝意云何？虚空有着不？有缚不？有执取不？」

诸苾刍言：「不也。世尊！」

佛言：「迦叶苾刍亦复如是，以无着无缚无执取心，入白衣舍，虽受利养，但欲为彼作诸福事，随自所得分量而受。复善作意，于自不高，于他不下。诸苾刍！以是义故，如迦叶苾刍者，应入白衣舍，堪受利养。」

尔时，诸苾刍重白佛言：「世尊！若诸苾刍为白衣说法时，或有清淨、或不清淨，其事云何？愿佛世尊，善为宣说。」

佛言：「诸苾刍！汝等谛听，当善作意，今为汝说。若苾刍，为欲令他发起信心，及作信心事给施衣服、饮食、坐卧之具、病缘医药，以是利故，为他说法者，此不清淨。若苾刍，于佛所说法，安住正见，离诸染污，如炼真金，去除矿秽，见如是法，证如是法，如佛所发起，是法能离生、老、病、死、忧、悲、苦恼，以如是法，为他演说，令他得闻如是法已，随顺修行，于长夜中，得大利乐，以此缘故，发生慈心悲愍等心，由是因故，令佛正法得久住世。诸苾刍！若起如是心，为他说法者，斯则清淨。」

「复次，诸苾刍！汝等当知，迦叶苾刍能起清淨心，为他说法，以清淨故，令佛正法得久住世。是故汝等诸苾刍众，亦应如是，如理修学。」

「又，诸苾刍！若有能起如是心，为他说法者，我说名为最上清淨真实，能令如来正法得久住世。」

佛说此经已。诸苾刍众，欢喜信受。

佛说月喻经

【经文信息】 大正藏第 02 册 No. 0121 佛说月喻经

【版本记录】 CBETA 电子佛典 Rev. 1.11 (Big5), 完成日期: 2010/02/26

【编辑说明】 本数据库由中华电子佛典协会 (CBETA) 依大正藏所编辑

【原始数据】 萧镇国大德提供 / 张文明大德二校, 维习安大德提供之高丽藏 CD 经文, 北美某大德提供, 法雨道场提供新式标点

【其他事项】 本数据库可自由免费流通, 详细内容请参阅 **【中华电子佛典协会数据库版权宣告】**
